



Ina piramida cun enzatgei essenzial pil carstgaun. Marc B. Bundi (sen.) envida da reflectar dil consum e tgei ch'ei essenzial pil carstgaun. FOTOS A. BEELI

# Expulsiuns creativas

Vernissascha dall'exposiziun d'art Regiunala19 a Laax

DAD AUGUSTIN BEELI / ANR

■ **Dumengia entuorn miezgi ei puspei massa glied interessada s'entupada ella Cularta a Laax. Ella casa d'art e cultura dattan endisch artistas ed artists singuls ed in pèr ina survesta dalla lavur artistica actuala ella regiun.** Igl ei buca l'emprems'expoziziun en quei liug. Dapi l'avertura il december digl onn vargau eis ei la siatavla. Mintga gada gartegia ei a quella gallaria a Laax dad attrer l'attenziun. Forsa perquei ch'igl ei in liug ch'animescha specialmein da filosofar e discutir digl art figurativ. La Cularta ei situada amiez il vitg, el meglier liug pusseivel. Ell'ei discretamein agl ur, e tuttinamiezia. Aschia eis ei cun artistas ed artists. Ils biars vivan e lavuran amiez il pievel cumin. Lezs capeschan savens buc il senn da quei far, nungir ch'igl ei lavur. Tras il dun ch'els han survegni en tgina han els in'occupaziun nunconvenziunala. Gudignar il paun da mintgagi cun art ei grev e pretenda curascha, disciplina e perseveronza. Quei vala per exempel per la gronda part dallas artistas e dils artists ch'ei dapresent ella Casa d'art a Cuera all'exposiziun annuala.

### Valurs e sfidas

Art ei cumbinau cun gusts, sentiments, estetica. Quei tut vala medemamein per l'exposiziun annuala pli pintga ch'ei s'aviarta dumengia a Laax. Singuls dils expositurs che muossan alla Regiunala19

ella Cularta ina da lur ovras ein separticipai all'exposiziun gronda a Cuera. Leu eis ei ina rimnada representativa digl art contemporan grischun. L'exposiziun pli pintga giudem la Surselva ei nuota meins provoconta ed inspironta. Ella Cularta s'expriman 12 artistas ed artists, tut ei pli pign e surveseivel, la qualitat equivalenta all'exposiziun gronda a Cuera. A Laax san ins contemplar sin duas alzadas mintgamai sis ovras. Las lavurs rendan attent a bellezias, a sfidas humanas, envidan da contemplar, reflectar e discutir. En egl dat l'installaziun da *Marc B. Bundi*. Dumengia, a caschun dalla vernissascha, ha in ni l'auter dau il tgau e tratg la schuiala. «Ei quei art?», han ins udiu. Igl ei art concepiun ed igl artist envida da reflectar.

Per la Regiunala19 a Laax ha il graficher ch'ei carschius si a Sagogn fatg ina piramida, ina biala piramada cun pupi da tualetta. L'installaziun cul tetel «valurs» consista da 1785 rollas. Ella s'associescha alla piramida dils basegns dil psicolog Abraham Maslow. Il contemplader duei reflectar, igl artist vul ch'ins seconfrunti culs basegns existenzials e cul mund materialistic. Igl onn vargau ei Bundi staus presents all'exposiziun annuala ella Casa d'art a Cuera.

Uonn eis el a Laax. Era *Notta Caflisch* e *Remo Albert Aligh* han gia exponiu a Cuera. Alla Regiunala19 muossan els mintgamai in'installaziun creada aposta per quell'exposiziun.

Ins surstat dallas fuormas da s'exprimer. Ir mo spert tras l'exposiziun ei nunpuseivel, ins resta pendius. Ins sto quintar in temps per seschar influenzer da ponderaziuns, fuormas ed objects, pigns e pli gronds. Cun ir mo alla sperta ves'ins strusch ils detagls. La platta d'acril cull'ovra da *Mathias Kunfermann* serevela sco ina fotografia ch'el ha fatg ord finiastra da sia casa a Sched. Ins sto mirar duas gadas per enconuscher ils tac grischs, igl ei ina gruppa da zeischs d'ogna che sgolan e saultan tras l'aria.

Alla vernissascha da dumengia vargada ha *Remo Arpagaus* accentuau sco commember dalla giuria la qualitat dalla Regiunala 19. Quei ch'ei tscharniu hagi vramein qualitat. La menadra dalla Cularta, *Yvonne Gienal*, ha presentau las 12 artistas ed artists e lur objects. Per dar peisa al criteri dalla qualitat porscha la Cularta plaz avunda. Sillas duas alzadas havess ei aunc massa plaz, ei ha denton aunc aria ed ei buca surcargau. Quei ch'ei exponiu al spazi. La Regiunala19 envida da discutir digl art e da siu senn. Creesch'ins art per embellir e decorar? Ni eis ei ina demonstraziun per l'atgna fama? Ei va per lavur e valurs, la finala era per valeta. Installaziuns, plasticas, pictura, performance, grafica intimeschan da reflectar surlunder.

**La Regiunala19 ella Cularta a Laax cuozta tochen ils 12 da schaner 2020. L'exposiziun ei aviarta mintgamai la gievgia tochen e cun dumengia dallas 14.00 tochen allas 17.00.**



Davon in'installaziun dil pèr Lea & Adrian discutescha Luis Coray. El ei promotur ed inziant dalla Cularta a Laax.



Visitaders attents contemplan e teidlan, vid las preits ovras dad Ursula Sandmeier ed Ursula Bapst Brunner.



**Riccarda Müller da Flem ha faldau ed entretschau sdremas da pupi, ella ha creau 21 objects da color.**



**Gudelia Kobelt Mlczek confrunta il visitader cun l'existenza humana. La figura dil tgau senumna «Sco ins cloma egl uaul».**



**Jane Gillespie da Flem ei scolasta pensiunada. Ella ha exponiu il maletg d'ina cuntrada atunila. Ils cavels oranschs ed igl oransch dalla cuntrada dattan en egl.**



L'aura ha lubiu dumengia dad ir ora el liber, en ed entuorn la Cularta a Laax han ins giu caschun da discutir.



In detagl silla fotografia che *Mathias Kunfermann* ha squitschau sin veider d'acril.